

**Imigresen tiada hak rampas passport mereka yang kritik kerajaan, kata PKR
Malaysian Insider
Mei 31, 2013
Oleh Md Izwan**

KUALA LUMPUR, 31 Mei — PKR mengecam Ketua Pengarah Imigresen Datuk Alias Ahmad ekoran kenyataannya yang mengancam untuk merampas passport mereka yang mengkritik dan memprotes kerajaan di luar negara baru-baru ini.

Pengarah Komunikasi Nik Nazmi Nik Ahmad (gambar) menyifatkan tindakan tersebut adalah cubaan Putrajaya untuk menghalang hak asasi seorang rakyat Malaysia disamping tidak mempunyai hak untuk memantau rakyat Malaysia yang berada di luar negara.

“Kenyataan baru-baru ini oleh Ketua Pengarah Imigresen Datuk Alias Ahmad yang mengatakan rakyat Malaysia yang memprotes dan mengkritik kerajaan Malaysia di luar negara akan ditarik balik adalah tidak mempunyai asas moral, undang-undang atau pentadbiran sekalipun,” kata Nik Nazmi dalam satu kenyataan media hari ini.

“Jabatan Imigresen tidak mempunyai hak untuk mengulas mengenai apa yang rakyat Malaysia akan lakukan di luar negara dan menggunakan kuasa kerajaan untuk menyekat hak rakyat,” tambahnya lagi.

Menurut Nik Nazmi, kenyataan oleh Alias tersebut dilihat satu lagi cubaan kerajaan untuk menekan pemimpin pembangkang khususnya selepas tangkapan besar-besaran di bawah arahan Menteri Dalam Negeri Datuk Seri Zahid Hamid kebelakangan ini dibawah Akta Hasutan.

“Kenyataan Alias ini menunjukkan corak yang mengelirukan dibawah regim Zahid yang sama sekali berbeza dengan apa yang dikatakan rekonsiliasi kebangsaan yang dicadangkan oleh Perdana Menteri Datuk Seri Najib Razak,” ujarinya lagi.

Dalam perkembangan terkini, Naib Presiden PKR Nurul Izzah Anwar semalam telah dihalang memasuki negeri Sabah oleh Jabatan Imigresen, malah pemimpin Umno di Sabah tidak bersetuju dengan tindakan tersebut dan menyifatkannya sebagai suatu yang tidak munasabah.

Naib Presiden PKR Chua Tian Chang sebelum ini turut dihalang masuk ke Sabah pada April lepas.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/imigresen-tiada-hak-rampas-pasport-mereka-yang-kritik-kerajaan-kata-pkr/>